

W03
BL
C56

Cornell University Library
BL 1920.C56

Lung men tao tsung yao chih /



3 1924 025 093 968 wos,ovc1

CORNELL
UNIVERSITY
LIBRARY



THE
CHARLES WILLIAM WASON
COLLECTION ON CHINA
AND THE CHINESE

NG SUI KEE

269 TO 1

[illegible]

GAYLORD

PRINTED IN U.S.A.

龍門道宗要旨

圖道人題



Chung, Pao-hua, ed.


W255388

106

nik

Digitized by Google

雷祖師聖像



邱祖師聖像

邱長春祖師真像



邱長春祖師山東登州府棲霞縣人生於宋高宗紹興十八年少好學不娶年二十在龍門遇王重陽祖師傳授全真道在龍門山修行弟子問道日衆不遠千里全真雖晚出而實得老聃之

傳與南宗專論

金丹不同故自

元以後龍門派

幾偏天下清初

以龍門派十代

祖曾山山師為

羅浮山五觀總

住持自是全真繼靈寶而管領仙山矣冲虛酥醪白鶴九天四觀皆龍門派惟黃

龍觀為嶗山派亦長春法嗣也甲申孟春人日因饒道士鍾寶華略述



龍門道宗要旨

圖道人題



丙戌春刊

龍門道宗要旨

羅浮山酥醪觀

住持鍾圓鏡編輯
都管黃圖慶校訂

全真教之起源

從新會陳援菴南宋初河北新道教考卷一全真篇上錄出

全真之初興。不過苟全性命於亂世。不求聞達於諸侯之隱修會而已。世以其非儒非釋。漫以道教目之。其實彼固名全真也。若必以爲道教。亦道教中之改革派耳。王惲秋澗集五八。奉聖州永昌觀碑云。後世所謂道家者流。蓋古隱逸清潔之士。巖居澗飲。草衣木食。不爲軒裳所羈。不爲榮利所怵。自放於方之外。其高情遠韻。凌煙霞而薄雲月。誠有不可及者。自漢以降。處士索隱。方士誕誇。飛昇煉化之術。祭醮禳禁之科。皆屬之道家。稽之於古。事亦多矣。徇末以遺本。凌遲至於宣和極矣。弊極則變。於是全真之教興焉。淵靜以明志。德修而道行。翕然從之。實繁有徒。其特達者各潛戶牖。自名其家。耕田鑿井。自食其力。垂慈接物。以期善俗。不知誕幻之說爲何事。敦純朴素。有古逸

民之遺風焉。以逸民名初期之全真。誠得全真之真相。

甘水仙源錄二有東平徐琰撰郝宗師道行碑。郝即王重陽弟子郝大通。徐號容齋。嚴實領東平行臺。招諸生肄古業。迎元遺山校其文。預選者四人。徐爲其一。至元末。拜翰林學士承旨。元詩選癸之乙選其詩。稱爲徐承旨琬。刊本避嘉慶諱也。碑曰。道家者流。其源出於老莊。後之人失其本旨。派而爲方術。爲符籙。爲燒煉。爲章醮。派愈分而迷愈遠。其來久矣。迨乎金季。重陽真君。不階師友。一悟絕人。殆若天授。起於終南。達於崑崙。招其同類而開導之。鍛鍊之。剗立一家之教曰全真。其修持大畧。以識心見性。除情去欲。忍耻含垢。苦己利人爲之宗。老氏所謂知其雄守其雌。知其白守其黑。知其榮守其辱。爲道日損。損之又損。以至無爲。莊生所謂游心於淡。全炁於漠。純純常常。乃比於狂。外天地。遺萬物。深根寧極。才全而德不形者。全真有之。老莊之道於是乎始合。重陽唱之。馬譚劉邱王郝六子和之。天下之道流祖之。是謂七真。師其一也。全真不尙符籙燒煉。而以忍耻含垢苦己利人爲宗。此遺民

態度也。謂其合於老莊。殆遁而之老莊耳。重陽起自金初。郝大通卒於金季。今謂重陽起於金季。偶失詞耳。

虞集道園學古錄五十。非非子幽室志云。昔者汴宋之將亡。而道士家之說。詭幻益甚。乃有豪傑之士。佯狂玩世。志之所存。則求返其真而已。謂之全真。士有識變亂之機者。往往從之。門戶頗寬弘。雜出乎其間者。不可勝紀。而澗飲谷食。耐辛苦寒暑、堅忍人之所不能堪。力行人之所不能守。以自致於道。亦頗有所述於世。爲其學者。常推一人爲主。自朝廷命之。勢位甚尊重。而邇其立教之初意。同不同未可知也。道園生較晚。目覩全真末流之貴盛。而疑其與立教之初意不同。洵稱卓識。立教之初。本爲不仕新朝。抱東海西山之意。何期化民成俗。名動公卿。東帛蒲車。相將巖壑哉。道園之所懷疑者此也。

終南山重陽宮。有金源_{碑撰}撰全真教祖碑。凡二千六百餘言。見金石萃編一五八。又有劉祖謙撰重陽仙跡記。碑高丈餘。寬五尺。二十六行。行五十九字。萃編末載。其畧曰。終南山重陽祖師。始業儒。卒成道。凡接人初機。必先使讀孝經道德經。又教之孝謹純一。其立說多引六經爲証。在文登寧海萊州。常率

其徒演法建會者五。皆所以明正心誠意少思寡欲之理。不主一相。不居一教也。師咸陽人。姓王氏。名詰。字知明。重陽其號。美鬚髯。目長於口。形質魁偉。任氣好俠。少讀書。係學籍。又隸名武選。天眷初。以財雄鄉里。歲饑。人多殍亡。有盜盡劫其資。一日物色得盜。終不之問。遠近以爲長者。正隆己卯。忽遇至人於甘河。以爲可教。密付口訣。又飲以神水。自是盡斷諸緣。同塵萬友。佯狂垢汙。人益叵測。嗚呼。箕子狂。九疇叙。接輿狂。鳳歌出。權智倒。橫直豎。均於扶世立教。良有以也。終於南時村掘地爲隧。封高數尺。榜曰活死人墓。又於四隅各植海棠一株。曰吾將使四海教風爲一家耳。三年復自實之。遂遷於劉蔣。大定丁亥夏。焚其居。人爭赴救。師婆娑舞於火邊。且作歌以見意。詰旦東邁。徑達寧海。首會馬鈺於怡老亭。馬亦儒流中豪傑者。與其家人孫氏。俱執弟子禮。又得譚處端、劉處玄、丘處機、王處一、郝大通等七人。號馬曰丹陽。譚曰長真。劉曰長生。丘曰長春。王曰玉陽。郝曰廣寧。孫曰清靜散人。並結爲方外眷屬。己丑季秋。留王郝於崑崙山。携四子西歸。抵汴。厲王氏逆旅。無何。呼丹陽付密語。無疾而逝。春秋五十有八。四子歸其

柩。葬於劉蔣故菴之側。丹陽廬於墓次。今之祖庭是也。有詩詞千餘篇。分爲全真前後集。傳於世。天興元年九月。翰林修撰同知制誥劉祖謙記。安西王府文學姚燧。以至元丙子中秋日書。並題額。閱此則全真教之起源大概可知矣。

呂純陽祖師說全真妙理

從七真傳錄出

所謂全真者。純真不假之意也。人誰無真心。一轉便非了。人誰無真意。一雜便亡了。人誰無真情。一偏便差了。初心爲真。變幻即爲假心。始意爲真。計較即爲假意。至情爲真。乖戾即爲假情。所謂初心者。即固有之心也。所謂始意者。即朕兆之意也。所謂至情者。即本性之情也。心中有真意真情。情中方見真心真意。由真心發而爲真意。由真意發而爲真情。是情即自然景象。無時非天機之呈露。然則人心可不真哉。人不真心。即無真意。無真意。即無真情。嘗見修道之主。動則私念迭起。念之私即心不真處。靜則欲念相循。念在欲即心不真處。私欲不絕發。或全無真意。或半真半假。即半真半假之際。正天

人相乘之時。是意也。情所不能掩也。驗真道先驗真情。驗真情即可知心真與未真。知意真與未真。故修真之道。必以意始。意誠心亦誠。即心所發之情亦誠矣。誠斯真也。誠若不真。見之於言。則言不由衷。非真言也。見之於行。則行不率性。非真行也。修之者。修去心外之心。意外之意。情外之情。當於舉念發言時。提起天良。放下人心。不許疑貳其心。混雜其意。誤用其情。方爲真心真意真情。一毫不假。即是真道。真道徧行。故謂之全真也。

按此篇是王重陽師得自 呂祖師傳授遂開全真大教邱長春劉長生譚長真馬丹陽郝太古王玉陽孫不二七真皆傳此道而以龍門派邱長春爲最大宗陳教友師謂邱長春立全真大教蓋未溯其源耳編者鍾圓鏡識

王重陽祖師與馬丹陽孫不二說修道之功

從七真傳錄出

道者覺路也。使人歸于覺路而出迷途也。然必由淺入深。以小致大。依次序做去。方可有功。

(一)要煉性。蓋性本先天之物。必須將他煉得圓陀陀。光灼灼。方爲妙用。

夫性與情連。性情發動。如龍虎之猖狂。若不煉之使其降服。焉能去其猖狂。而歸于虛無也。煉性之道。要混混沌沌。不識不知。無人無我。煉之方得入法。降龍伏虎之道既行。又必鎖心猿而拴意馬。所謂心猿意馬者。心如猿猴之狡。意如烈馬之馳。故必拴之鎖之。使猿無所施其狡。馬無所逞其馳。使歸於靜定。靜定之功。能奪天地造化。陰陽妙理。能靜則萬慮俱消。能定則一念不萌。順而行之爲凡。逆而行之爲仙。要使心內無一毫雜念。莫一點障礙。空空洞洞。不着一物。杳杳冥冥。莫得一樣。所謂一絲不掛。一塵不染。此乃道之大畧也。

性本先天之物。圓陀陀。光灼灼。雖有其名。而無其形。今爲勉強圖個形像。先畫一個圈圈。後又畫一個圈圈于圈圈之內。點了一點。頭一個圈兒。是混混沌沌。天地未分日月未判之像。名曰無極。無而生有。故于圈內生出一點。是名太極。這一點生天生地生萬物。這先天由太極而生。這一點即爲一氣。故曰先天一氣。這性從先天而發。發於未有其身之前。著於已沒其身之後。這一點靈性。是不生不滅之根。故曰靈根。這靈根無人

不有。祇是凡人自昧耳。

(二)要却病。却病者。非却風寒暑熱之病。要却貪嗔痴愛之病。此病一却。百病不生。可以延年益算。可以成佛成仙。除病之道。要除病根。尋着其根。病不難除也。其病多半從貪嗔癡愛得來。又由酒色財氣所致。是故修行之人。必先除酒色財氣。去其外感。後絕貪嗔癡愛。去其內傷。病根自拔。病體自愈。然後大道可修。長生可保。今指酒字而言。有人知酒之爲害於道也。誓必除之。及見酒猶津津以戒自持。或因人勸。或見人行令。而遂有欲飲之意。本不會飲。而此意一起。即如飲也。此乃酒之病根也。除者須於起意之時除之。方能拔淨其根。有人知色之爲害於道也。誓必除之。及見色猶念念以戒自持。或嬌姿獻媚。或窈窕呈情。而心意頗動。遂有羨慕之情。本不會通。而此情一動。即如通也。此乃色之病根也。除者須於起情之時除之。方可盡去其根。可見酒色之病根。皆藏於心意之間。欲去病根之法。先正其心。後誠其意。而病根自斷也。其病根之不斷者。由心意之未正也。心意未正。偶發一念。雖不會飲而此意已欲飲也。雖不會通。而此情

已欲通也。先時原無此想。因感外而動內。猶水中之月。岸石激水動。則月亦與之俱動。雖無其實。而形影已搖也。眞道不可得也。欲求斷根之法。儒有非禮勿視。非禮勿動。見如不見。聞如未聞。釋有忘人忘我忘衆生之語。道有視之不見聽之不聞之說。此皆可以鋤酒色之病根也。至於財字難言矣。有因道緣未就。而暫作計較者。有因身家甚窮。而姑求生活者。其勢不得不然。尚可畧迹原心。其餘若講門面者。講聲勢赫奕衣服麗都飲食豐富者。講田園廬舍者。以及奇技淫巧者。常在名場利藪中打擾。屢於算盤斗秤內苛求。既欲求名求利。又欲成仙成佛。這個樣兒。豈不可笑。至於氣字。人人未平。剛氣誰人有正氣誰人養。不過使一切浮氣躁氣血氣俗氣。或於貌上流。或於言中爭勝。或於事中爭強。或於忿中逞雄。認氣不認理。安有浩然之氣哉。如此等人。也來學道。豈不可笑。此等病根。欲求絕斷之法。儒曰不義之富貴。於我如浮雲。又曰持其志無暴其氣。釋曰不受福德。得成於忍。道曰悉破慳貪。慈心下氣。此皆可以除財氣之病根也。以上四端。欲斷病根。必正心念。儒在乎醒。釋在乎覺。道在

乎悟。能醒能覺能悟。則天下事看得透澈。而成道不難也。

長春祖師本傳

從道藏輯要翼集八金蓮正宗仙源像傳錄出

師姓邱。名處機。字通密。號長春子。登州棲霞縣濱都人也。生於金熙宗皇統八年。（圓慶謹案即宋高宗紹興十八年）戊辰正月十九日。幼聰敏。日記千餘言。未弱冠。即學道。隱崑崙山。大定七年。開重陽道化。九月。乃拜於寧海之全真庵。重陽贈以金鱗。遂爲弟子。重陽爲訓今名字。九年冬。從重陽遊汴梁。寓王氏旅邸。明年正月初四日。重陽仙化。師與馬譚劉三師。舉仙蛻葬於劉蔣。廬墓二年。歲甲午秋。乃入磻溪穴居。日乞一食。行一簑。人謂之蓑衣先生。晝夜不寐者六年。復隱隴州龍門山。苦行如磻溪時。遠方學者咸依之。大定二十八年二月。世宗皇帝召赴闕。問答稱旨。賜以巾冠。館於天長觀。夏五月。召見於長松島。問以延生之理。師對曰。惜精全神。修身之要。恭己無爲。治天下之木。富貴驕淫。人情所常。當兢兢業業以自防耳。誠能久而行之。去仙道不遠。誕詭幻怪。非所聞也。上善其言。七月。再召見於便殿。師剖

析至理。上大悅。翼日、賜上林桃。師不食茶果十餘年。至是取一枚啖之。應制進瑤臺第一層詞。八月、得旨還祖庭。賜贐禮。辭不受。明昌二年、辛亥。東歸棲霞。以故居爲觀。勅賜額曰太虛。泰和七年丁卯春。元妃施道經一藏。驛送太虛觀。貞祐二年、甲戌冬。山東亂。帥府請師牒諭。所至皆投戈拜命。寧海登二州遂安。四年、春。金宣宗皇帝、命東平監軍王庭玉召師。不赴。興定三年己卯。師居萊州昊天觀。時齊魯陷宋。八月、宋寧宗皇帝、命大師彭義斌召師。亦不赴。是歲、元太祖成吉思皇帝。在柰蠻國。命侍臣劉仲祿捧詔聘師。十二月、仲祿至萊州。師慨然應命。明年庚辰正月。師遂起行。十八大師從。二月、入燕城。行省館于玉虛觀。三月、進表陳情。四月、道出居庸關。忽遇羣盜。皆稽首而退。十月、師至武川。進表使回曷刺捧詔促召。辛巳春。踰嶺而此。七月、至阿不罕山。留弟子宋道安等九人。立棲霞觀。率趙虛靜輩輕騎以行。壬午三月。上遣太師阿里鮮來迎。詔諭仲祿鎮海護從師來。勅萬戶播魯只。以甲仕衛師過鐵門。四月、方達印土。見皇帝於大雪山之陽。上設二帳於御幄之前。居師以便訪問。十月望。上設庭燎。虛前席。延師問以

王道。時太師阿海阿里鮮侍。師對以節慾乃修身之要。愛民爲永國之方。及陳天道好生惡殺之意。上悅。命侍臣書之簡冊。其詳見於慶會錄。癸未二月。辭歸。上勉留。三月、復辭。制可。所賜備極豐腆。皆辭之。與諸弟子皆歸。甲申三月。至京師。是月、上遺曷刺傳旨。邱神仙至漢地。凡朕所有之城池。其欲居者居之。往迴事跡。見西遊記。行省請師住天長觀。自爾使者赴行宮。皇帝必問邱神仙安否。還必有宣諭語。行省又施瓊華島爲觀。師命工葺之。乙酉春。師折梨花一枝。與玄寧居士張去華曰。此男子之祥也。去華以瓶養之。至秋結實二十有四。果生一子。即明誠也。延祥觀有枯槐一株。師以杖擊之。曰、枯槐再活。後槐復榮茂。九月、熒惑犯尾宿。宣撫王揖請師禳之。是夕熒惑退數舍。丙戌五月。太旱。行省請師祈禱。大雨三日。丁亥五月。詔以瓊華島爲萬安宮。改天祥觀爲長春宮。賜師以金虎符。主領天下道教事。特旨蠲免道門差稅。六月二十三日。雷雨大作。太液池南岸崩。北口山摧。師聞而笑曰。山摧池枯。吾將與之俱乎。七月初九日。師陞寶玄堂。示衆以生死事。復曰、教門用力。大地塵勞。心地下功。全拋世事。各宜精進。毋使虛度時光。

正法難遇。道教事。尹志平、李志常、相繼主之。遂書頌云。生死朝昏事一般。幻泡出沒水長閒。微光現處跳烏兔。立量開時納海山。揮斥八紘如呎尺。吹噓萬有似機關。狂辭落筆成塵垢。寄在時人妄聽間。畢、歸葆光堂。端坐而逝。有磻溪鳴道文集、西遊記。行於世。今棲霞縣太虛觀。即其故居。磻溪長春成道宮。即修真之處。京師大長春宮。即登真之所也。

元世祖皇帝封號長春演道主教真人。

武宗皇帝加封長春全德神化明應真君。

贊曰、巍巍長春。一篆煙雨。磻溪六年。雪山萬里。洪範丹書。爲王者師。玉符金虎。演道明時。

清規須知外參訪

（按以下俱據玄門必讀錄出）

夫天府考式。仙裔本枝。道有宗源。仙有法派。法派不明。其人不真。宗源不清。其來必濁。所以全真參訪。必明法派宗源。而後可遊洞天福地名山也。自從

東華帝君一脈五傳至重陽王祖。全真道教。通於四海。故法派說因重陽一度。七真法派後裔。各有名號。凡血脉嫡傳。必知派目。一曰龍門派邱祖。二曰隨山派劉祖。三曰南無派譚祖。四曰遇山派馬祖。五曰華山派郝祖。六曰崑山派王祖。七曰清淨派孫祖。邱祖又再傳孫祖曰金山派。歷傳綿久。凡與方外萍水相逢。所言派脉不真。必有偽雜。遇此。必須盤問。審其道學。察其虛實。如不究徹玄微。參悟道妙。而機鋒龐雜。言語支離。謂之欺名盜義之流。混玷仙風也。

一凡全真雲水祖師所傳。有隨身七寶。一蒲團。方外煉魔。二衲衣。攝伏心性。三簞瓢。訪賢飲食。四棕笠。禦風雨。避霜雪。五棕扇。拂開塵事。六青囊。秘藏月經。七橈拐。以彰大道。清風明月。如若全備。問之有答。言義無虛。謂之博學道士。其中恐有賴教遊食葷酒之輩。或有被套包裹脫衣而睡者。內多俗物。是爲詐入玄門。來歷不真。不可不察也。

一凡全真所戴之巾。有九款。一唐巾。二冲和巾。三浩然巾。四逍遙巾。五紫陽巾。六一字巾。七綸巾。八三教巾。九九陽巾。如是九式。惟戴唐巾者多。

。是仿唐朝純陽呂祖師之式也。冷則幅巾。雪則戴浩然巾。上等有道之士。受初真戒者。戴綸巾偃月冠。受中極戒者。戴三教巾三台冠。受天仙戒者。戴冲和巾五嶽靈圖冠。凡巾皆用立色布緞所造。蓋立爲天。頭圓象天。天生水。水機於道。尊道故頂於首也。或戴異式等巾。用雜色紗緞所置。乃九流雜入定詣應法等門。非真修之士也。或蓬頭髻。或清風綉頭簪冠。或身穿衲衣混元三皇千針書本二仙懶衲等衣。或腰繫九股縑。呂公縑。或手提風火棕拂。或五明降魔扇。或跣足。或多耳麻鞋棕履。此內有虛實不同。察其威儀規矩。學問修持。叩其踪跡法派。經典功課各事。倘或不全。其中必假。外相既不能全。內修亦未必能通達也。更有俗家小帽素珠。皆愚昧下人齋公之類。更恐有異端邪教。理宜覺察。不可不知也。

一凡全真掛單。始入叢林。或名山宮觀。菴堂廟院。全憑規矩。所以包裹蒲團。放於客堂門首。與知客稽首。右便末位。乃知客之位。左便末位。乃當家之位。兩位俱不宜坐。一問答悉有起止。謹按丹經而說。出言勿誇飽學。博覽莫恃才能。問答已畢。入丹房靜坐。次日清晨開靜。即起梳洗。整衣上

殿。謁

聖朝眞。緩步登壇。不得正中參拜。蓋正中之位。乃當家之位也。至恐衣履不潔。於殿外傍參亦可。或有八字脚立。雙手合掌。以至頭如椿碓。臂若犬扒。或跪叩四五。或立揖二三。若此者。必是庸蠢之漢也。

一凡遊方禮師。既欲參訪高賢。俱要器具整齊。初到入院。便看西廊有息肩駐鶴等字。於此便歇。欲久住。則擔子平放。或經過擔子。一頭高。一頭低。靠在壁上。取袍搭在左手。其行囊放於客堂之外。或有值堂知客出迎。便穿衣稽首。賓主坐定。或問來歷。某處動身。答曰。從某處來。某府某縣人氏。在某處入道。皈依某師。不宜講及俗事。言畢。知客送入雲水堂。與堂主拜畢。送別。知客另謝過堂主。又至客堂謝過知客。回與雲水同人禮畢。凡自己衣物。檢點包好。鋪單了畢。復入客堂行禮。曰。即日恭惟知賓大德。起居多福。弟子久聞仙隱。特來瞻仰尊顏。荷蒙收錄。丹房展鉢。不勝感激之至。稽首。或款茶畢。起身相謝曰。適聞輕踐方丈。荷蒙照點下情。無任激切屏營之至。稽首行禮畢。辭歸。主人答曰。山門有幸。鶴駕光臨。有失

遠迎。不勝惶愧云云。

一凡客欲起丹。主相留曰。院門寥寂。堂厨淡薄。敢望高士。久留鶴駕。起助道風。無任攀戀望恩之至。稽首。

一凡常住接客者。須過三日請入。看驗文憑。某處受道。某姓某名。一一書錄青冊。然後安丹。須要知己知人。毋得任性任意。自是行坐前後。必讓尊卑。上殿登堂。必依次序。

一凡全真朝謁。外則尊重威儀。內則真心誠敬。注想凝神。端拱對闕。鞠躬不過眉。躬如滿月。五體投地。拜不即起。必待氣足。然後興身。須待神清。然後如前再拜。更有三跪九叩之禮。稽首揖手之模。若進鉢堂。行十方體。始從左旋而進。終從右旋而退。與大眾作揖。堂主都管典座茶頭俱作揖。此必上士。即有知賓來陪。於客堂先茶後飯。靜室安丹。如下士任其散步。隨堂茶飯。乃於十方堂歇之。恐其禮貌不全故也。

一凡全真行住坐臥。俱有約規。問答言談。悉有起止。所以習演如鶴步。乃效道骨仙風。坐如提石。臥如彎弓。行如清風。立如青松。出聲如病。舉動如

雅士寒儒。問答須按丹經道典。指迷莫引俗務閒談。或行如風擺。座若垂蓮。或擅談國家之事。美論佛家之禪。或求非大道。聽信旁門。誑惑他人。自尊飽學。此係無師指教。道聽途說之流。皆假冒全真。以行其欺罔者也。

一凡全真服式。以青爲主。青者東方甲乙木泰卦之謂。又爲青龍生旺之氣。是爲東華帝君之後脈。所以有青木泰卦。皆喻言隱義。以藏全真性命雙修之理也。朝參公服。頂黃冠。戴玄巾。着青袍。繫黃縵。外穿鶴氅。足穿白襪。着雲霞鑲履。取五行之俱備。若宗律兩師。加中單禮足。可謂合式也。

一凡全真初會之時。或問踪跡。那宮觀。那一派。或常住何人。在何處皈依。但恐其徒知七真宗派。而不知許真君有靜明派。薩真君有西河派。老君有混元派。玄帝派。茅山靜一派。朝元觀閭祖派。尹真人樓觀派。張三丰新宗派。徐祖清微靈寶正一寶田等派。此數派俱有門人在外。參學道法。尋訪高士名賢。或遙謁宗師教主。既慕名而至。進謁時問答不僞。真修無虛。若行師生之禮。筵會以盡賓主之情。如問時不知法派來歷。妄談雜事。此乃詐僞之徒。非參訪道教之高士也。

一凡全真內修。有五經四書之典。猶儒者之學不可缺一也。五經者。陰符、道德、清靜、龍虎、黃庭經也。四書者。參同契、悟真篇、三皇玉訣、青華秘文也。又有道書全集。一切真人諸品仙經丹書。題起皆隨時能講。剖義無差。釋理有據。此爲參學留心於大道。明理之士。尤以默默自修爲上。倘或欣談爐火煉汞彼家採戰服食按摩存想搬運空禪念佛諸等雜事者。三千六百傍門。九十六種外道之流。更有不通書義。呼牛作馬。不明道理。以白爲黑。見高明者嫉妒萬般。見老弱者欺壓百狀。祖師云。此爲敗教之魔軍。地獄之種子。

一凡全真必先功行。乃可漸入仙境。謹按皇經云。從此即漸進。修成道侍聖。所以外修必習五經四書爲重要之典。五經著。度人經、玉皇經、玉樞經、三官經、北斗經、此外修五經也。四書者。生神章、濟煉科、祈禱儀、千金方、此外修四書也。更有諸品經懺。俱宜虔學。逐一精通。誦之必應。禱之必靈。或爲國爲民。水旱蝗蟲。刀兵瘟疫。飢饉饑饉。保災扶危。施藥濟幽。拔苦普渡薦亡。是爲修真本務之事。如或妖言捏怪。左道邪術。僞法禱魔。

指化騙俗。假經索利。違科棄典。飲酒食肉。五葷九厭不斷。此爲民間耗鼠。叫內魔軍。陰冥必報。

一凡全真知天樂道。終日如愚。稀言自然。清虛冷淡。薄味甘殮。或棲山林。或居洞府。或隱塵市。或萍踪浪跡。全在慈悲爲門。清靜爲道。柔弱爲德。利濟爲功。操持爲行。若乃孤高倨慢。嫉賢妬能。誇己謗人。廢公毀善。言清行濁。內僞外恭。此非學道之士也。

學道須知內參訪

若夫學道高賢。希仙烈士。旣慕全真大教。須知性命雙修。若不參訪名師。豈得天機妙訣。跳出樊籠。拋離火坑。除情割愛。捨妄歸真。黃冠鶴氅。爲太上之門人。羽扇芒鞋。作東華之弟子。操持戒行。磨煉身心。覩諸邪道。如覩冤仇。避諸愛慾。如避水火。殮風宿雨。滅富貴之凡心。戴月披星。絕奢華之妄念。簞瓢隻筮。不辭萬里之遙。野鶴孤雲。惟尋一心之樂。安貧而積德。知命以待時。琢磨塵垢。修養性天。至或訪名山而掛搭。或投洞府

以安丹。或進鉢堂而說法。或入叢林以訪友。須知忍辱藏垢。切要謹言慎行。心存柔遜。志戒剛強。勿生是非之見。宜忘物我之心。絕巧棄智。爲立德始基。含光守虛。乃進道根本。動靜施爲。遵五祖之儀範以約束。行住坐臥。依七真之規矩以修持。所閱丹經。道德、陰符、龍虎。欲聞玄妙。悟真、千金、參同。至要於三皇玉訣。至顯於青華秘文。規中指南。篇字減而言徹。黃庭內經。註理真而竅明。南華逍遙。文深而義奧。覽之道味無窮。皇經清靜。性見而心明。觀之道蘊易悟。博學審問。苦志殷勤。求道若軒轅之走膝。問禮如仲尼之虛衷。不憚進履之謙。休惜斷臂之痛。自感明師指教。必得至人真傳。引證性命之宗。而尋搜根蒂。深窮生死之旨。以明辨本來。盟天方談魁斗。歃血乃示台罡。要知大道。當究一炁、二儀、三才、四象、五行、六合、七政、八卦、九宮、十極。須言言而省悟。欲知丹法。必曉十轉、九還、八關、七返、六通、五明、四門、三元、二弦、一竅。宜字字以參詳。採陰陽升降於圖中。審水火返還於身內。知止方明造化。誠意始覺妙音。守真抱一。對景忘情。湛然萬緣不染。自然一旦貫通。性天瑩徹。實

際圓明。期印一襟之朗月。堪舞兩袖之清風。或擇洞天而入室。或選福地以閉關。預交雲朋霞友以爲道伴。次結草舍茅菴以作丹房。調琴理性。飛劍降魔。驅龍伏虎。則會合風雲。捉兔擒烏。以交接鉛汞。轉地軸則復通乾谷。撥天關則姤退坤宮。鼓巽風而煉煨。運離火以烹煎。加減進退之有時。溫養沐浴之無錯。太乙壺中。滿飲長生之酒。黃庭宮內。永結不老之丹。停工罷戰。混俗和光。或隱塵寰以積行。或棲市廛以累功。德滿人間。名題天上。靜待玉京之詔。早謁金闕之尊。宴賜蟠桃。勅遊閬苑。凡屬皆超於極樂。仙友共上於蓬壺。此清修之結果。即大成之標榜也。茲外或有纔離俗網。乍入玄門。未滌已往之愆。懸想將來之福。或根鈍智淺。豈究天機之妙訣。或孽深德薄。難逢聖道之明師。性隨物轉。意被情纏。致使一心着於二念。三毒擾於四非。因其五蘊不空。故爾六賊難伏。七情牽動。八識分攻。九竅之邪。永干於眞境。十惡之業。滋蔓於靈臺。如雲迷皓月。霧掩青天。慧光不耀。聖智難明。靈機因此而閉塞。妄欲由此而疊生。斯無神氣之凝。烏有返還之妙。正所謂心不修而功不大。天神難佑。行不廣而心不死。仙道難成。

學者莫負清靜之虛名。休執無爲之假相。雖曰草衣木食。徒自苦體勞形。若頑坐存思。必着於魔境。但妄行搬運。定結於幻丹。恐致思中生害。須防有始無終。叮囑學者微細參詳。勿錯修持。須尋正道。勇猛精進。宜遵九節之功。奮發修行。漸進三乘之路。合身心而兼養。並內外以交修。靜則窮理盡性。動則積行累功。須行時時之方便。務存種種之慈悲。拔苦濟幽。葛仙翁由是以成道。扶災施藥。薩真君因此而登仙。除害蕩邪。許旌陽功完而拔宅。佑民祝國。陶弘景行滿以飛昇。歷古成仙。悉從苦行而超越。迄今末學。豈離積德以成真。勤除障寃。即生定慧。常含默默之光。每存綿綿之息。則善芽增長於三田。而靈根植培於寸地。此漸修之法門。即上乘之階級也。要知漸進雖有二途。至道皆原一本。凡慕道英賢。矢志參訪。俱當體此前修。庶不溺於傍門左道。故識斯論。以照昏衢。堪爲修真寶鑑。辨道靈梯。乃參訪之關鑿。亦雲遊之路引。進我教者執爲符券。誠云纖毫失度。即照暗黑之愆。頃雲邪言。必犯禁空之醜。天神耳目。呖尺非遙。克告行人。自當覺察。倘言行無愧。陰德週隆。自有神仙作汝師。至此何憂身不

度。

戒食銘

凡入齋堂。肅整衣冠。雲厨煮粟。非是等閒。無內無外。粒米同餐。齋堂靜食。匙鉢盤旋。飯可重添。揚言切忌。勿斜側肩。行遵道體。休看衣衫。莫論客主。一體皆安。謹慎檢點。務要心堅。道氣常存。一體同觀。莖薪粒米。工夫一年。念頭若錯。孽孽難填。抗毛帶角。骨肉奉還。

長春真人清規榜

夫住宮觀者。冷淡清虛。瀟灑寂寞。見性爲本。養命爲源。柔弱爲常。謙和爲德。慈悲爲用。方便爲門。在衆者常居低下。處靜者勿起塵情。所有塵勞。量力運用。不可過度。每一衣食。不可過用。每計錢銀。不可積剩。治身衣物。不可貪求。或常住之物有餘。濟贍來往經過貧寒之士。或於真假。常要分明。掃除塵垢。刷釜汲水。擔薪炊膳。除己私意。勿起嗔心。各處一室

○澄心辨道。各分局次。當占一科。或以互換。調煉真性。不得執着爲用。不得傳遞是非。謹要降心。除削人我。了却聲色。離形去智。湛然無欲。見三教門人。須當平待。不得怠慢驕心。無事不得出觀。晚夕早扃其戶。清晨即啓其門。倘有送供者。平常接待。無施利者。勿起二心。凡有遊歷之士。但過三日。是高明者舉進住房。無志氣者他處遊行。次驗腳冊分據。詳察緣由。若不明。其間恐有隱匿詐僞之人。不可穩便。須防一等道人。愚頑之徒。奸詐之輩。以言語蠱惑。點污徒衆。破除菴舍。常談是非。便令逐出。若有投觀出家者。不得擅便引進。先觀道氣。次看悟道恰通。或祖上家風善惡。自己德行淺深。高明者攜之。愚頑者却之。或於觀中幹辦等事。先問觀主。次與合堂大衆評論。出家無論早晚。年紀不擇老少。但得達理明心。堪爲有道也。凡有化緣。不得詐僞師家名目。若使指託宮觀。要取施主財物。自己用度。便是私瞞常住。

上天鑒察。必無輕譴。故茲榜示。

長春真人垂訓文

吾教後輩門人知悉。爾等既入玄門之正教。必通夙世之善根。一證今生之福果。二修來世之不墜。若有向道之真心。當遵

太上之律法。奈何只圖道教。以度平生。並不知玄科之有禁戒。粒米文錢。俱有關係。乃世人之膏脂。農夫之血汗。非用力何能消。豈無功而可受。汝等愚迷。不自揣度。不肯修持。反言本教無功。便向外道著意。以致姦盜邪淫。損人利己。或葷酒賭博。敗壞教宗。或燒爐煉汞。哄騙惑人。誤信傍門。毀謗正教。以此無賴。種種不堪。豈是汝等道教所當爲者。且莫說汝等後學。難逃靜觀果報。即天神有過亦黜其位。地祇有過。亦降其職。神仙有過。謫降塵凡。鬼祟有過。則滅其跡。君王有過。則失其國。臣僚有過。則加其刑。士人有過。則削其名。庶民有過。則掠其福。一切過惡。各有所歸。何況汝等作孽者乎。豈無報應。故吾教後學門人。當悟自己出家。蓋爲勤破輪迴苦惱。方纔進道。豈有反造愆尤。重增罪孽。法有三乘。遵循本宗而行。量力而進。立志以守。苦行以修。方是道家之路也。夫上乘者。修身

養性。苦志參玄。證虛無之妙道。法天地之正氣。除塵世之冤愆。廣行仁義。大積陰功。只候三千功滿。八百行完。然後身超三界。位列仙班。乘鸞鶴而朝金闕。駕彩雲而赴瑤池。千真恭敬。萬神護持。天地同體。日月同光。豈不爲出家大丈夫哉。中乘者。誠心演教。禮懺誦經。調

太上之玄科。稱天尊之寶誥。信心禮禱於神明。虔心齋戒於廟院。清靜身心。闡揚大道。一念純真。常存正法。運盡滅度之時。自有善人擁護。或轉送皇宮。或投生官宦。或拜相而位列三公。或爲君而身登九五。萬民敬仰。四海歸投。人中殊勝。豈不尊乎。下乘者。建宮廟。印經造像。修橋補路。戒殺放生。施茶捨藥。周濟窮苦。不慳不吝。轉化爲人。或生富貴之家。遂心滿意。一生享用。豈不快哉。如是修爲。三乘之法。句句分明。倘有不悟省。酒色財氣不除。不如還俗歸家。染苦爲甜。任意所爲。隨心所欲。豈不足樂。如何久戀玄門。迷而不悟。造下無邊惡孽。果報難逃。有志氣者可以精進。無夙緣者可以速退。不然。罪孽加倍。吾甚憐憫。爲此訓焉。倘有見此同心。聞訓轉念。重整剛志。痛改前非。猛勇精進。聞者省悟。見者開發。省

悟者回光之心也。開發者返照之意也。如不早覺。必然永墜冥途。常沈苦海。化爲異類。到此之時。悔之莫及。聰明達理。細細思之。今生錯過。大道實難過矣。

尹喜真人訣云

神仙伎倆無多子。要曉靈人變作呆。巧機逐末心勿用。酒色財氣絕其途。忠孝義慈行方便。息心息氣息精神。誰能述得諸般例。便是長生大道仙。或問於李理德曰。凡人初入道。欲修仙者。敢問從何而起。答曰。入道之初。減事省言爲最高。又能大事化爲小事。小事化爲無事。於是意無所起。久久則神全。過去事勿言。未來事勿說。現在事咬舌。心無所動。久久則氣壯。乃修仙修道之階梯。實成仙成道之基址矣。

品德行

爲品爲德。有其品然後有其德。有其德然後有其行。故曰品德行。

悟了長生理。秋蓮處處開。金童登錦帳。玉女下香階。虎嘯天魂住。龍吟地魄來。有人明此道。立便返嬰孩。

問道

道德乾坤祖。陰陽是本宗。天魂生白虎。地魄產青龍。運轉泥丸住。搬精入上宮。有人明此法。萬載貌如童。

龍虎

性定龍歸海。情忘虎隱山。性情收拾了。真火透玄關。

正一

心裡不邪謂之正。無中生有謂之一。

道士

道爲天地之主。士爲萬物之宗。

道人

包羅天地謂之道。體在虛空謂之人。

先生

諸法皆由我。雲遊不染塵。古今無遍數。豈不是先生。

出家

一塵不染是出家。莫作非爲是生涯。有人問我修行事。雨散雲開月自華。

全真

常行祖師教。日習太上經。煉就真如性。豈不是全真。

稽首

稽首稽首。本是天長地久。長生不朽。

道冠

一雙鳳眼觀前後。萬法收來在內藏。七寶玲瓏皆有跡。崑崙頂上放毫光。

唐巾

唐巾不是古來巾。呂祖流傳到至今。一對連環分日月。兩條飄帶掃浮雲。

道袍

袍服原來不計春。寬宏廣大裹乾坤。紅塵半點何嘗染。暑寒任是亦難侵。

腰帶

九龍同貫一絲縑。道教威儀常繫腰。鎖住心猿並意馬。免迷本性入浮囂。

蓬頭

蓬頭原是古家風。一法流傳萬法通。放下絲毫無垢礙。自然一性合浮空。

丫髻

丫髻原是鍾離譜。崑崙頂上按日頭。修行皆服長生水。笑殺愚人白了頭。

草履

草履千莖結自然。三山五嶽任流連。逍遙不踏繁華地。行滿生雲上九天。

棕扇

寶扇原來一片棕。等閒搖曳萬緣空。任他魔怪並邪妖。藉此輕翻永滅踪。

瓢鉢

瓢化千家飯。孤身萬里遊。爲求不老計。普度遍千秋。

蒲團

蒲團結來圓又圓。修行打坐有根緣。三千功滿丹書詔。一炷來騰上九天。

楸枰

舉起頂天立地。橫擔日月山河。撥開乾坤骨體。轉去萬象森羅。

道童

道童原來古道風。爲因凡世出塵籠。如今意在雲霄外。萬法無名四海通。

衲頭

千針百線幾人修。無暑無寒不計秋。袖裡靈丹携一點。管教跨鶴上瀛洲。

葫蘆

三寸葫蘆半折腰。蓬萊山上有根苗。五湖四海滄江水。不足葫蘆一汲消。

靈丹

火養靈丹本自然。坎離交媾在中田。功完服食飛昇去。便是長生不老僊。

袞衣菱

三尺縱橫布。誰知造化工。內藏諸法寶。包裹太虛空。

雲水

心似白雲常自在。意如流水任東西。水清雲散乾坤靜。一輪明月正當空。

鉛汞

心火下降謂之鉛。腎水上昇謂之汞。能遣二物歸黃道。鍊就金丹宜保重。

巖瓢

此瓢本是聖人留。顏回未用自藏收。如今得付道人手。天地乾坤一瓢收。

善人

諸惡不作謂之善。性體皆空謂之人。

居士

清靜法身謂之居。萬法皆空謂之士。

性

皮是包帶。骨是撐袋。筋是穿袋。血是貫帶。

命

性立命在陰。一晝一夜共三千六百息。無有暫停。定一時。奪天地陰陽之造化。息半刻。臻百世之遐齡。人能到此。真息一定。百病消除。饑渴自無矣。

長春真人執事榜

嘗思人生天地之間。如白駒過隙。忽然而來之不可禦。去之不可止。及其六八變滅。四大分離。身尙不存。生非我有。觀其所以然者。莫若體乎至道。

察其所自修者。莫若明乎本心。蓋心即道。道即心。心外無道。道外無心。惟在吾人一默會已耳。故作凡作聖。皆由我造。悟真悟道。不出他行。先須領解。次須進修。運水搬柴。無非此個。誦經禮懺。只在此兒。各請具眼同觀。勿得當面錯過。自令雲水相逢。煙霞集會。倘逢師友。恒心領悟。了知出世之家風。端志修行。堪作昇仙之活計。毋虧功行。當悟本來。所有玄憲清規。凡諸執事。備陳於右。

一當家主持者。乃叢林之棟梁。大衆之綱領。必以道德齊備。仁義兼全。威儀可法。功德無虧。待衆以謙爲本。欺客以禮爲先。凡事要有約束。待衆體乎本心。敬神聖儼然在上。視仙真如在殿庭。名題玉籍。字列神京。闡太上之玄秘。宣

玉帝之金經。鄉閭仰德。衆庶蒙庥。稍有意弛者。倍罰供齋。

一都管者。總理常住一切大小事務。爲叢林中之表率。作大衆之領袖。以道德蘊於心胸。以仁義彰於形狀。松筠節操。水月襟懷。威儀內慎。獨恒修。胸臆中忍辱培養。以責人之心責己。恕己之心恕人。寬以待衆。謙以持身。扇真

風於海宇。闡立化於諸方。名重當時。德流遐邇。不負尊位之任。稍有忌憚。懈怠徇私者。重罰。

一巡照者。乃叢林鑒察都司。統轄一堂大小執事。代

天宣化。贊祖闡揚。提拔有德高人。而修真養性。巡察犯規羽士。而按律施行。倘有失察。及明知犯規而徇庇不舉罰者。大眾察出。同罰供齋。

一庫房者。掌管錢銀糧米。經收出入。錙銖佈施。乃衆善之脂膏。顆粒齋糧。實諸緣之血汗。勿欺勿昧。此心方可對青天。若染若侵。私念豈堪盟白水。務須登記明白。收放得宜。倘有差失隱匿之情。許大眾當堂攻訐。輕則罰齋。重則逐出山門。

一知客者。爲常住之儀表。先存謙恭敬讓。更須禮貌端莊。迎送必合清規。酌答要依立範。虛懷應客。正已待人。倘有驕慢者。重罰。

一書記者。乃叢林中之類拔萃之人。超凡越衆之輩。文式藏於胸中。立機蘊於心內。申奏疏文。俱要端楷。精誠感格上帝。回發書札。禮當清正。恭敬會答高賢。動中取靜。而默運身心。忙裏偷閒。而窮悟道妙。務求證聖成真。

勿令轉凡入趣。偷或字意差訛。同衆面較。如故執拗者。罰齋。

一主經者。總括玄綱。糾諸執事。

一副經者。宰制道範。鑒察厨事。

二者乃天人之眼目。仙聖之規模。以道德存心。以仁慈利衆。向父母初生之前。悟本來之面目。在聖賢經教之內。發性地之光明。先調中和命脈。後覩竅妙真機。造化爐中。擒龍制虎。乾坤鼎內。採坎填離。以升堂入室之旨。袖裡提撕。以明心見性之功。意外領悟。導引福善。開化賢良。動靜肅恭。威儀誠敬。稍有差過者。偕衆公罰。

一龍虎二單。誠意辨道。協志修身。除雜念以觀心。息思慮而注意。調神攝靜。工夫常蘊於丹田。舉步輕行。戒律每存於赤窟。須守玄憲。勿犯清規。違者跪香。

一日月二單。誦經禮懺之際。以戒慎恐懼而注想天顏。以齋戒中正而昭事

上帝。同音讚儀。矢志皈衣。偷朝奏失儀。誦念疎忽者。同衆公罰。

一左堂。執提轄侍者。

一右堂。執協理公司。

二者實大衆之綱紀。作後學之筌蹄。輔佐玄範。運轉法輪。出入巡查。恒加敬畏。上下止靜。務宜純和。糾察輕躁之失儀。攻訐行藏之越理。言詞莊重。氣色溫柔。有犯玄規者。罰跪香。

一靜主者。道德兼全。仁義並著。坐靜安園。齋精養氣。以清靜爲本。以定慧爲宗。去俗中之境界。作物外之生涯。朝暮朝眞。祝延

聖壽。專符入聖超凡。出入金門自在。煉三寶。作金丹。守一眞。爲大藥。幹開玄竅。返復陰陽。燦百焰於大鼎之中。聚萬化於一堂之內。三千功滿。名列仙班。八百慇懃。方超凡劫。如此則陰籍無名。仙班有分。領衆冲舉。上昇雲霄。眞仙比肩。天地人同駕。倘有公私人我者。一例罰齋。

一化主者。導引賢良。開化福善。募緣於貴人君子。積功於聖境靈壇。當想利物利人。毋得徇私徇己。倘有偏私者。倍罰供齋。

一買辦者。務須潔己。凡屬所用齋糧供品齋疏什物等項。俱要入庫房酌議開

單。買辦照依時價。毋得染指侵欺。有壞道心。倘有隱欺私意情弊。查出重罰。

一庄頭者。出倉催收。協理常住。香燈國課糧食。全靠田租。兩季出倉。催收協理。務要各盡其職。智言善行。監督晒運。以保無虞。倘有偏私者。重罰。

一知山巡樹者。樹木爲觀殿之壯觀。隱居之護衛。時常防人盜伐。所以分防巡察。以保無虞。倘有徇私賣放等弊者。查出重罰。

一侍香燈殿主者。侍奉香燈。陳設品供。誠心潔淨。勿令厭穢。觸犯靈壇。從事精勤。當處恭敬。同臨法會。倘有缺誤遺漏者。罰跪香。

一茶頭水頭者。潔備淨泉。烹煎玉露。獻供

仙聖高真。運水須淨泉源。人我必戒污穢。倘有失誤者。罰跪香。

一典座飯頭者。爲大衆之司命。叢林中根本。辦上賢齋饍。宜謹宜潔。勿怠勿疏。菜品精製。六味調和。戒餽餘之不潔。防人物之殘失。所以格天真而歆享。資道衆以和身。倘有忽畧者。罰跪香。

一椿米者。日中所司。善信脂膏。修道根本。衆餐日食。須憑穀米。砂石務必去淨。椿作亦要精勤。倘有粗率忽畧者。罰齋。

一蔬菜頭者。修行多以蔬菜。爲本園內務。要勤力栽培。四時菜蔬。相連不斷。留心播種。勿使失時。倘有疏懶。以致菜食不接者。罰齋。

一火頭淨頭者。早則開靜先起。晚則止靜方眠。竈前火燭。加意謹慎。洒掃階庭。務須潔淨。違者罰跪香。

以上條款。伏望人人著意。個個留心。倘有推託倚靠等情。大衆自有眞實公舉。兩堂功課。宜持五品黃經。莫怠十方有志。高人常住。自當恭敬。不可獨善其身。偷外明而內暗。口是而心非。或陽奉而陰違。或公入而私出。仁人善信。視我爲貪鄙之徒。謾法靈官。自有分明報應。寧諸人負我。不可我負諸人。

酥醪觀清規榜

伏以

太上開不二法門。忍辱第一。祖師承抱一教旨。規範爲先。天下不容無禮神仙。人間豈有犯規羽士。此修心煉性之所。非飲酒食肉之場。如縱談人我。好造是非。如此存心。焉能修道。務要互相警覺。一洗前非。勿因意見之不投。以圖睚眦之報復。爲示清規如左。

一凡姦盜邪淫。敗 太上之律法。壞 列祖之宗風者。架火焚身。

一凡拐帶欺騙者。灸眉燒單。

一凡擾亂清規。私收近觀五十里內土人爲徒者。革出山門。介紹人亦應議處。

一凡賭博金錢。及吸食洋煙者。起單逐出。

一凡談講燒丹煉汞。哄騙迷人者。杖責革出。

一凡酗酒鬧事。耆茹葷腥。攪亂常住者。杖責革出。

一凡詈罵大眾。及惡言侮辱人父母者。杖責革出。

一凡拜師不知宗派者。不留。

一凡在常住辦事。尅扣利己。隱瞞大眾者。罰齋。

一凡倚官勢。及恃族黨。欺壓道衆者。集衆公議。杖責革出。

一凡上堂不穿衣冠。只着汗衣小帽者。罰跪香。

一凡上殿登壇。談笑喧嘩。背立呼童。斜目曲視。吃烟唾痰搖扇。拜跪不恭者。罰跪香。

一凡司理寶殿樓閣早晚香燈。供桌靈壇不潔者。罰跪香。

一凡朝賀 聖誕。及朔望朝真。不到者。罰跪香。

一凡上齋堂食飯。不穿衣冠。及跌快子落地者。罰跪香。

一凡常住物件。私自欺客。不向庫房報明者。罰跪香。

一凡出門不告假。不領簽者。罰跪香。

一凡烹厨供獻。妄用污穢柴水。罰跪香。

一凡出入上燈後不回者。罰跪香。因公事乃免。

一凡戴黃冠及上殿朝真之冠。入厨行恭者。罰跪香。

一凡開靜不起。及止靜不息燈者。罰跪香。

一凡夜寢之後。大驚小怪。言語驚衆者。罰跪香。

一凡厨房拋棄五穀。毀壞常住傢私什物者。罰跪香。

一凡常住公事。不幫辦者。罰跪香。

一凡有道友羽化。辦理喪葬事宜。一應常住辦理。清齋供衆。如死者身邊有銀。常住不用辦理銀兩。惟供齋而已。其所遺什物。有徒弟在觀送世。則歸徒弟。無徒弟在觀。則歸常住。同住道友。不得假託遺囑領受。如徒弟在觀。辦理師傅喪殯。有錢銀貼出。更爲賢徒。否則亦要視所遺財物多少。以定喪殯之豐儉。有餘方得入己。

道祖法系

妙無天帝太極之初。生出三炁。爲玄元始炁。化生先天老君。自爾以來。先天老君乃以玄炁時而化生。初三皇時化爲萬化天師。中三皇時化爲盤古先生。後三皇時化爲鬱華子。神農時化號大成子。軒轅時化號廣成子。少皞時化號隨應子。顓頊時化爲赤精子。帝嚳時化號錄圖子。帝堯時化號務成子。帝舜時化號尹疇子。夏禹時化號真行子。商湯時化號錫則子。先天老君雖是累世化度。而未誕生之形跡。迺於商王太甲時。分身化炁於楚之亳州府苦縣

賴鄉曲仁里流星闔。寄胎於玄妙玉女身中八十一年。至武丁時庚辰歲二月十五日卯時。母攀李樹。從左脅降生。鬚髮皓然。其顏如童。遂以李爲姓。諱耳。字伯陽。號聃。因髮皓顏童。故又號老子。至周文王時。號熒邑子。爲守藏史。武王時。號育成子。遷柱下史。康王時。號郭叔子。平素抱樸。少思寡欲。執古之道。以御今之世。隱道不彰。謙德不顯。內則固眞養命。外則遠害全身。博古知今。無微不徹。東訓尼父。致有猶龍之嘆。西化金仙。大地作獅子吼。其著述道典丹經。流傳於世者。不可勝數。至秦昭王九年。西昇崑崙。計九百九十六年矣。後又降度尹喜眞人。莊周眞人。張道陵天師。東華帝君。

太清仙境虛無自然太上老君道德天尊。

道祖混元派

混元乾坤祖 天地日月星 三教諸聖師 金木水火土 鴻濛判陰陽
太極比河圖 仁義禮智信 生老病死苦

尹喜真人。姓宓。字公文號關尹喜。河南陝州靈寶縣人。四月初八日誕生。太上混元派棧枝。證位洞明無上清眞文始玄中大法師。

法派曰尹真人派

道德清教上 雲城守煉丹 九重天外子 方知妙中玄 心靜自然體
髮白面童顏 袖吞乾坤大 陰陽造化間

莊周真人。生於楚。與孟子同時。老子授以眞道。著南華經逍遙經等書。

法派曰南華派 派目未詳

天師。姓張名道陵。字輔。江西廣信府貴溪縣人。漢留侯九世孫。生於光武甲午年元夜。七歲時。遇太上授道德經。及長。五經墳典天文地理河洛之書。無不通曉。在世一百二十三歲。證位三天教主輔法大天師。

法派曰正一派 派目未詳

北五祖法系

東華祖師。姓王。諱誠。字玄甫。號東華子。係古仙東園公。於漢永壽元年乙未六月十五日降生。得太上老君降傳大道。隱於崑崙山。復居五臺山上紫府洞天。自稱少陽帝君。後居於終南山凝陽洞。以道授鍾離正陽祖師。王重陽祖師。元世祖封號東華紫府少陽帝君。武宗加封東華紫府輔元立極大帝君。十月十六日上昇。（圓慶謹案，以下五祖七真事實，俱據道藏本金蓮正宗仙源像傳及七真年譜校改）

法派曰少陽派

宏宣無大道

習學理自明

有個長生路

飛身上雲程

正陽祖師。姓鍾離。諱權。字雲房。號正陽子。陝西西安府咸陽縣人。奇才神勇。仕漢爲將軍。因兵失利。退入終南山修煉。得遇東華帝君。授以至道。復隱晉州羊角山。束髮爲雙髻。自稱天下都散漢。道成。天帝封號太極左宮真人元世祖封號正陽開悟傳道真君。武宗加封正陽開悟傳道垂教帝君。授道於呂純陽祖師。四月十五日誕。五月十八日上昇。

法派曰正陽派

陰陽生造化

動靜合本元

自得神仙旨

方知妙中玄

純陽祖師。姓呂。諱巖。字洞賓。號純陽子。河南歸德府柘城縣人。係古之皇覃氏再世。父讓。爲唐太子右庶子之官。母王氏。師年二十。娶劉校尉之女。年四十六。爲天寶進士。遇正陽祖師於長安酒肆中。師授枕作黃梁夢。醒而悟。退隱廬山。修鍊成道。五月二十日。天詔爲九天採訪使。故有詩云。糾司天上神仙籍之句。元世祖封號純陽演正警化真君。武宗加號純陽演正警化孚佑帝君。授道於劉海蟾祖師。四月十四日誕。

法派曰純陽派

寂然無一物

妙合於先天

元陽復本位

獨立玉京山

海蟾祖師。姓劉。諱操。字宗成。直隸遵化州玉田縣燕山入。年十六登甲科。仕遼爲宰相。遇正陽祖師點化。解組學道。乃作詩云。拋離火宅三千口。屏去門兵百萬家。改名玄英。號海蟾子。遍遊參訪。於秦川。復得純陽祖師。

授以金液丹法。元世封號海蟾明悟宏道真君。武宗加封海蟾明悟宏道純佑帝君。授道於董凝陽張紫陽。十月十四日誕。六月十五日上昇。

法派曰海蟾派

省悟自歸隱

修養本元神

散誕蓬萊客

逍遙閬苑人

重陽祖師。

姓王。

諱中孚。

字允卿。

陝西西安府

咸陽縣魏村人。

早通經史。又

習弓刀。

易名世雄。

別字德威。

試獲武舉。

時年四十七歲。

回頭猛省。

解組

棄妻。

拂衣塵外。

入道改名嘉。

字知明。

號重陽子。

遊於終南山甘河鎮。

得遇鍾呂二祖師。

授以金丹口訣。

乃有詩云。

四十八上始逢師之句。

次年庚

辰。

復遇二師於醴泉觀。

更授金丹真旨。

二師指東方曰。

汝何不觀之。

重陽

回首。

而望見七朶金蓮結子。

二師笑曰。

豈知如是而已矣。

將有萬朶玉蓮房

也。

二師別去。

重陽乃於終南縣南時村作穴居。

名活死人墓。

後出關東遊。

接引度世。

欲應金蓮之兆。

乃抵甯海州。

授道於邱劉譚馬郝王孫七真。

著有

全真前後集。

韜光集。雲中錄。分梨十化說行於世。

元世祖。

封號重陽全真

開化真君武宗加封重陽全真開化輔極帝君。十二月二十二日誕。正月初四日上昇。

法派曰重陽派

自己有人寶

何須向外尋

一切功滿

丹書來詔宣

北七真法系

長春祖師。姓邱諱處機。字通密。號長春子。山東登州府棲霞縣人。生於宋高宗紹興十八年戊辰正月十九日。自幼好學。不娶。年二十。在海州。得遇重陽祖師。傳授丹訣。又號符陽子。在龍門山修道。乙亥歲。金主屢召不赴。後壬午。元太祖自奈曼國手詔致聘。乃與弟子十八人。往見太祖於雪山之陽。拳拳以止殺爲勸。問爲治之道。以敬天愛民爲本。問長生久視之術。以清心寡慾爲要。太祖深契其言。癸未乞東還。賜號神仙。丁亥詔賜師金虎符。掌管天下道教。講道說因。每行於世。甲申。奉旨回京。居太極殿。後改太極殿爲長春觀。是年七月初九日。告諸弟子。與之沐浴更衣。呼衆徒於側。

跌坐長春觀吟詠。吟畢仙遊。壽八十歲。時人有詩讚曰。太祖興元日。真人獨占邱。片言能止殺。萬里不虛浮。羽脫長春觀。池枯太乙流。誰裁釋老伎。乃與帝師儔。癸未。世祖詔贈長春演道主教真人。有磻溪集。鳴道集。西遊記。慶會集。長春語錄。行於世。武宗加封長春全德神化明應真君。

派曰龍門派

| | | | | |
|-------|-------|-------|-------|-------|
| 道德通玄靜 | 眞常守太清 | 一陽來復本 | 合教永圓明 | 至理宗誠信 |
| 崇高嗣法興 | 世景榮維懋 | 希夷衍自甯 | 未修正仁義 | 超昇雲會登 |
| 大妙中黃貴 | 聖體全用功 | 虛空乾坤秀 | 金木姓相逢 | 山海龍虎交 |
| 蓮開現寶身 | 行滿丹書詔 | 月盈祥光生 | 萬古續仙號 | 三界都是親 |

長生祖師。姓劉。諱處玄。字通妙。號長生子。山東萊州府掖縣武官莊人。生於宋高宗紹興十七年丁卯七月十二日。事母至孝。誓不婚宦。清靜固守。視外物全不介意。屢欲修道。其母不許。至孝宗五年。母歿。重陽見其神采不羣。嘆曰。松之月。竹之雪。故不受於黃塵。劉祖便拜爲師。後常乞食煉形。

。離人遠物。至甲午年。溷跡京洛。心灰益寒。形木不春。人餽則食。問則答。如是數年。遷洛陽。得井。知三生前修煉處。後二年間。因讒被捕。業抵獄。俄市人見之城南。意師逃出。往視獄中。師方熟睡。獄吏驚駭。以所見白上官。方悟爲有道者。亟令出之。丁巳年。章宗詔赴京。問以至道。師曰。至道之要。寡嗜慾則身安。薄賦歛則國泰。上悅。敕賜回故居。道成。定方圓滿。天光發明。至甯宗嘉泰癸亥年二月初六日。鳴鼓集衆徒曰。吾欲赴仙師之約。爾等勿懈修真。遂翛然而解。著有仙樂太虛盤陽同塵安閑修真文等集。道德註。陰符演。黃庭述。行於世。元世祖封號長生輔化明德真人。武宗加封長生輔化宗玄明德真君。

法派曰隨山派

| | | | | |
|-------|-------|-------|-------|-------|
| 思道明仁德 | 全真性復常 | 景高和禮義 | 嗣信守忠良 | 裕謙賢族泰 |
| 宗枝茂維祥 | 盛益希誠樸 | 立元世永昌 | 金木萬古續 | 智慧保甯光 |
| 聖體通三界 | 廣大演自清 | 志虛空教化 | 月盈妙中黃 | 用功悟仙號 |

丹書現榮陽。行滿乾坤秀。圓融衍相逢。蓮開龍虎詔。超昇崇利亨。

長眞祖師。姓譚。諱處端。字通正。號長眞子。河南河南府洛陽縣人。後遷山東登州府甯海州。生於金天會元年癸卯三月初一日。幼墮井。坐水上無驚。復遇火不怖。人皆異之。年十五。有志於文學。因感風痺疾。大定七年。聞馬丹陽事重陽爲師。遂棄室。詣全眞菴。拜重陽爲師。學道。因夜寒甚。爐竈清冷。殆不可忍。重陽遂展足。令師抱之。少頃。汗流被體。如臥甌中。旦起重陽以盥餘水令其洗面。於是宿疾頓除。授以眞道口訣。時出居河朔獲嘉縣新庵。一日。師鎖菴。往衛州。有廟官見菴中火光。窺之。見師擁火而坐。後遊磁州。遇一醉徒。問曰。汝何來。師未答。醉徒以拳擊^師口。齒折血流。而顏不改。遂吐齒手握歌舞而去。丹陽聞而讚曰。一拳消盡平生業。復遊於華陰純陽洞。示衆曰。六年滅盡無明火。十載修成換骨丹。滿滿虛靈無罣礙。已知跳出死門關。遊洛陽。居東尋菴。時淳熙丁未年七月十二日書行香子。末句云。湧出陽神獨自歸。書畢仙遊。異香凝室數日。著有水雲集行於世。元世祖封號長眞雲水蘊德眞人。武宗加號長眞凝神玄靜蘊德眞君。

法派曰南無派

道本崇真理 玄微至妙仙 立在雲霄上 功成必有名 大教明清靜

宏演德維良 悟元光體性 一志復圓融 冲壽通族大 了然衍望興

中和宗知巧 親友聖書詔 煉成保金丹 裕讓常禮義 慈信滿乾坤

龍虎廣修現 樸照永遐齡 山川千古秀 智慧化全家 盛希守忠賢

丹陽祖師。姓馬。諱鉦。字玄寶。號丹陽子。山東登州府寧海州人。生於金天

會元年癸卯五月二十日。母夢麻姑賜丹一粒。吞之。覺而有孕。遂名從義。字宜甫。兄弟五人。師居次。家饒於財。號馬半州。幼時。常誦乘雲駕鶴之詩。有一相士見曰。額有三山。手垂過膝。真大仙材也。及長。娶里人孫忠顯幼女。生三子。長庭珍。次庭瑞。三庭珪。師嘗題詩云。抱玄守一是工夫。懶漢如今一也無。兩殿試不樂。乾道三年丁亥。師年四十五歲。夢從一道士登天。適路遇重陽師云。有夙契也。遂坐談竟日。忽悟修真之道。師事重陽。得真訣。孫氏亦好道。與夫同拜重陽學道。深究丹經妙旨。夫婦各處一

室。煉心還虛。七年辛卯。三田復返。夫妻相繼成道。真人著有金玉集。漸悟集。三寶語錄等集行於世。元世祖封號丹陽抱一無爲真人。武宗加封丹陽抱一無爲普化真人。十二月二十二日上昇。

法派曰遇山派

| | | | | |
|-------|-------|-------|-------|-------|
| 自元來正志 | 冲壽成仙丹 | 忠靜得禮義 | 了然見朝天 | 致虛端篤悟 |
| 本理淳全玄 | 清微通大化 | 眞常合妙言 | 崇教和法永 | 守仁百工夫 |
| 恭敬明智慧 | 聖德立遐齡 | 宏應演音信 | 高復現祥光 | 誠慈爲黃貴 |
| 金木會相逢 | 雲昇龍虎交 | 洞希世用行 | 榮茂乾坤秀 | 蓮開獻寶興 |

廣寧祖師。姓郝。諱大通。字太古。號廣寧子。山東登州府甯海州人。生於金熙宗天眷三年庚申正月初三日。初名璘。號恬然。事母至孝。有出塵修真之志。好讀易。曉陰陽術數之學。隱於卜筮。大定丁亥年。二十八歲。遇重陽祖於甯海州。背坐於卜肆。師曰。請先生回頭。重陽祖曰。君何不同頭耶。師忽驚異。遂拜重陽祖爲師。重陽授以二詞。師大悟曰。有母在。未即入道。

。次年母終。師遂棄家入崑崙山。尋拜重陽爲師。重陽乃解衲衣。去袖而與之曰。勿患無袖。汝當自成矣。師携瓦罐乞化。至岐山。如此六年。得遇神人。授以大易秘義。乃還甯海州。作易圖三十三章。皆天人之蘊。能入夢言人之悔吝吉凶。崇慶壬申年十二月晦日。留頌辭世。壽七十三歲。著有太古集、心經解、救苦經解示教真言等傳世。元世祖封廣寧通玄太古真人。武宗加封廣寧通玄妙極太古真君。

法派曰華山派

至一無上道 崇教演全真 冲和德正本 仁義禮智信 嘉祥宗泰宇

萬里復元亨 清靜通玄化 體性悟誠明

玉陽祖師。姓王。諱處一。字玉陽。號傘陽子。山東登州甯海東牟人。宋高宗

紹興十二年壬戌三月十八日。母夢丹霞被體而生。師七歲時。疾死而復甦。由是知死生之事。常山行。見一老翁坐於石上。又聞空中人語。稱玄庭宮主。大定戊子二月。聞重陽祖至州。王師往迎。拜爲師。重陽攜至崑崙山烟霞

洞。授以真道口訣。次年。遷居查山。拾一傘。觀傘柄有傘陽子三字。因此又號陽傘子。又居雲光洞。後遨遊齊魯。大著神異。度人逐鬼。出神入夢。召雨搖峰。呼鶴喚鵲。起死噓枯。嚮化千里。金主詔赴。問以衛生爲治。師曰。含精以養神。端拱以無爲。九問九答。大副宸衷。隆禮有加。遇妬嫉。賜以煬。飲之乃歸。入池不死。髮盡脫。不能受冠。上聞究治。終不告。辭歸隱。丁巳年四月二十二日上昇。著有雲光集顯異錄傳世。元世祖封號玉陽體立廣度真人。武宗加封玉陽體立廣慈普度真君。

法派曰崑崙派又曰崙山派

清靜無爲道 至誠有姓名 金玉功知巧 通此加地仙 立冲宗義德
懋演教宏元 中和真法永 智慧保神全

清淨祖師。姓孫。諱不二。號清淨散人。山東登州府甯海州人。生於宋宣和元年己亥正月初五日。母夢六鶴飛舞於庭。一鶴入懷。覺而有娠。乃生仙姑。性聰慧。嚴禮法。及長。適馬丹陽祖。克盡婦道。生三子。因夫拜重陽祖爲

師。築全真菴。學道。乾道丁亥十月朔。重陽於菴鎖環。明年正月十一日出環。仙姑夫婦悟分梨十化之教。二月初八日。丹陽棄家從道。九年重五日。仙姑詣金蓮堂堂師重陽出家。重陽祖授以天符雲篆秘訣。後仙姑居洛陽風仙洞修煉。七年道成。三田復返。百竅周流。在洛陽行化。門人請求道要。仙姑書卜算子詞示曰。握固披衣候。水火頻交媾。萬道霞光海底生。一撞三關透。時壬寅年十二月二十九日。書畢。謂弟子曰。吾今歸矣。各善護持。乃跌坐而逝。是日丹陽在文登七寶菴中。謂門人曰。今日有非常之喜。衆叩其故。丹陽曰。孫仙姑今日已仙去。明年春。報者至云仙姑於是日返真於洛陽矣。著有詩詞傳於世。元世祖封號清淨淵真順德真人。武宗加封清淨淵真玄虛順化元君。

法派曰清淨派

全真通玄理 大道德無爲 性合灰尸解 只此百功夫 虛靜明常應
宏仁守志誠 嗣教宗元化 悟本自還齡

龍門派下

嶗山祖。姓孫。諱玄清。號海嶽山人。乃龍門派邱祖第四代徒孫。係山東青州府壽光縣孫家巷人。於明宏治九年八月二十三日。降生在嶗山明霞洞。出家。初拜李顯陀爲師。後至鐵茶山雲光洞。得遇通源子。指點五行前後昇降出入天門運籌之法。又至即墨縣。得遇太和真人。引至黃石宮修行。時方十九歲。蒙傳授三花聚頂。五氣朝元。在黃石宮苦煉二十餘年。後遇斗蓬張真人。共談修真秘傳內藥諸口訣。一旦豁然貫通。復回明霞洞重修。嘉靖二十一年。抽鉛添汞。悟證身心。至嘉靖卅七年。到京白雲觀。坐鉢堂一載。大著靈異。適京中大旱。求雨有功。蒙上大加恩賞。封護國天師左讚教主紫陽真人。享壽七十叁歲。隆慶叁年六月二十六日上昇。

法派曰金山派因在嶗山修真亦曰嶗山派

玄至一無上 天元妙理生 體性浮空坐 自然是全真 常懷清靜意
合目得金丹 道高扶社稷 留名萬古傳

南宮祖。姓李。號清秋。乃龍門派邱祖第十代徒孫。得至人傳授真道口訣。道成。得證天仙後。秘授曾一貫祖師。

法派曰南宮派

子午卯酉用

辰戌丑未懸

無爲常清靜

龍虎服大丹

拾一代祖。姓曾。字一貫。號山山。乃龍門派邱祖第拾一代徒孫。得李清秋祖傳授真道口訣。恬修道成。後居羅浮山冲虛觀。五觀總住持。有寶劍除妖。又有符藥救濟人民。適值廣東省城大旱。兩廣制軍聞曾道人有道。請赴省求雨。果然求得甘霖大霑。官民共樂。大著靈異遺跡。七月拾五日羽化。

凡在外參訪。宜謹佩牒文。宗枝法派。以便關津渡口。照驗牒文放行。不敢阻當。牒文如左。

爲嚴禁除不守清規整肅道教事。發仰天下名山洞府出家修真道教人等知悉。欽奉列朝聖旨。查理不知宗派紊亂道教人等。自昔東華帝君度正陽帝君。正陽帝君度純陽帝君。純陽帝君度海蟾帝君。海蟾帝君度重陽帝君。重陽祖度

邱劉譚馬郝王孫七位真人。自昔至今。傳流宗派。子孫後代。接續宗枝。但出家之士。投拜明師。參求入道。須用宗派牒文。雲遊天下。若遇關津隘口。如果係

太上門下弟子。眞修行者。各府州縣執此派牒。驗實放行。如遇不知宗派。假裝各處名山道人。或參五成群。夜聚曉散。騷擾廟宇。劫財傷人。往來作細。難辨眞假。及無派牒文憑。查明送官。依律治罪。庶道教不致紊亂。棍徒難以潛入。謹遵。

羅浮山酥醪觀都管勞明煒印行
道人蕭明德校對

2073



Wason
BL1920
C56+

ASIA

管子地員篇

卷四